



Namminersorlutik Oqartussat ingerlatseqatigiiffiutaanni aamma tamakku ataanni ingerlatseqatigiiffinni siulersuisuni ilaasortat akissarsiaqartinneqalernissaannut politikkip kaajallaasitanngortinneratigut pisortatigoortunngortinneqarnissaa pillugu Inatsisartut aalajangiiffigisassaattut siunnersuut.

(Naalackersuisut Siulittaasuat)

(Siullermeerneqarnera)

Naalackersuisut siulittaasuat siunnersuummik nassiussaanut qutsavigerusupparput. Nuannaarutigaarput, kiisami ersarissumik paasiuminartumillu Namminersornerullutik Oqartussat ingerlatseqatigiiffiutaanni akissarsiaqartitsinissamik politikkimik pilersitsisoqalermat.

Pisariaqarpoq, siulersuisuni ilaasortat akissarsiaqartitaanerata naapertuuttuullunilu ersarissuunissaa.

Siorna siunnersuutigineqarmat, Demokraatit pingaartissimavaat siulersuisuni ilaasortat akissarsiaasaannut suliaq ersarissuussasoq, akissarsiat siulersuisuni ilaasortat suliakkerneqartarnerannut naapertuutissasoq, aammali ingerlatseqatigiiffinnut piginnaasaqarluartunik suliaminnullu pikkorilluinnartunik kajungerineqarnissaanut periarfissiissasoq.

Tamanna maluginiarparput, ilaatigut siunnersuummi nassiunneqartumi pingaartinneqarsimammat, tamannalu iluarisimaarparput.

Naalackersuisut toqqarsimavaat siunissami ataatsimiinnermi imaqarniliat Naalackersuisut nittartagaanni tamanut takusassiarineqartalissasut, naak imaqarniliat ingerlatseqatigiiffiit nittartagaanni tamanit takuneqarsinnaagaluartut. Iliuseq kusanartuuvoq, taamaasilluni inunnit soqutiginnittunit ingerlatseqatigiiffiit assigiinngitsut piffissami aaliangersimasumi suut oqallisigisimaneraat atuarsinnaassanmassuk aammalu paasiuminartumik malinnaaffigisinnaassammatigit.

Iluarisimaarparput, kaajallaasitamik nutaamik suliaqarneq ukiup uuma naannginnerani piareereersimassammat.

Neriuppugut, akissarsisitsisarnermut politikki ingerlatseqatigiiffinnit tigulluarneqarumaartoq.

Siunnersut akuerisassanngorlugu innersuussutigaarput aammalu Aningaasaqarnermut-Akilerartarnermullu ataatsimiititaliamut oqallisigisassanngorlugu ingerlateqqillugu.